

Animadvertimus quoque nihil Tibi, eisdemque Canonicis potius esse, quam immobili fide, et observantia Nobis, et huic Petri Cathedrae firmiter adhaerescere, et ex animo rejicere. et damnare, quidquid a Nobis, et ab hac Apostolica Sede proscribitur, ac damnatur. Intelleximus item, Tibi eisdemque Canonicis summopere cordi esse omnia indesinenter suscipere consilia, ut isti praesertim fideles devitent, ac detestentur tot perniciosissimos errores impiasque doctrinas, quibus Dei hominumque hostes divinam nostram religionem si fieri unquam posset, labefactare, immo funditus evertere, et jura omnia divina et humana delere omnemque honestatem, virtutem, et justitiam de medio tollere commoliantur. Equidem inter gravissimas, quibus premimur, acerbitates summo solatio, et consolationi Nobis fuere hujusmodi egregii Tui, et eorundem Canonicorum sensus omnibus laudibus dignissimi. Itaque dum Tibi et ipsis Canonicis ex animo gratulamur, nihil dubitamus, quin luctuosissimis hisce christianae, civilisque reipublicae temporibus omnis a Te, et ab ipsis, Te duce, impendatur opera in catholicae Ecclesiae causa, ejusque doctrina ac juribus strenue tuendis, in tot nefariis adversariorum insidiis detegendis, erroribus profligandis, conatibusque reprimendis. Ac etiam certi sumus, Te, Venerabilis Frater, pro eximia Tua religione, et episcopali zelo, nihil unquam intentatum esse relicturum, quo fideles Tibi commissi in catholicae veritatis professione magis in dies stabiles et immoti permaneant. Perge vero una cum Tuo Clero, Populoque fidei ferventissimas Deo adhibere preces, ut exurgat, et judicet causam suam, et omnes Ecclesiae suae sanctae, et Apostolicae hujus Sedis inimicos humiliet, disperdat, eosque de iniquitatis via ad rectum veritatis, justitiaeque tramitem reducat. Denique Tibi persuade, praecipuam esse, qua Te prosequimur, benevolentiam. Cujus quoque pignus esse volumus Apostolicam Benedictionem, quam effuso cordis affectu Tibi ipsi, Venerabilis Frater, et commemoratis istius Cathedralis Templi Canonicis, cunctisque aliis Clericis, Laicisque fidelibus Tuae vigilantiae concreditis peramanter impertimus.

Datum Romae apud S. Petrum die 3 Aprilis Anno 1865.

Pontificatus Nostri Anno Decimonono.

Pius PP. IX. mpp.“

His Dilectissimi Fratres in Christo perlectis, procul dubio magis ac magis in fide Catholica et fidelitate, venerationeque erga Successorem Petri in vinculis, corroborati, excepistis laetabundi nuntium de *benedictione Apostolica* pro Vobis et populo fidei peramenter e Vaticano elargita, quam proxima occasione Parochianis Vestris significetis nec desistatis, eos in fide sanctae Matris Ecclesiae, conformiter tenori utriusque Documenti, ultro consolidare, ad preces enixas pro incolumitate Principis Magisterii Apostolici, ac populi fundendas commonere, demum Vosmetipsos in militia pro aris continuo exercere, hostesque Ecclesiae prosternere.

E Praesidio Episcopali.

Tarnoviae die S. Stanisl. Eppli Mart. 1865.

Nr. 1699.

Quae Curatiae a persolvendo tributo æquivalente liberatae sunt.

Responsio e Rescripto Exc. C. R. Locumtenent. Commissionis Cracov. die 29. Apr. a. c. N. 9930. Circulari elucet in sequentibus: